

Գալուստ նոր Դատաւորի : Վէճ Լատինաց 'ի Ս . Յարութիւն : Երկրոս
Ժողով 'ի դատարանի : Վրդովուին Լատինաց : Փոխանակ Բդեշխին Իս-
րահիմ աղա : Բռնութիւն Լատինաց :

ԵՆՍՍ նոր Դատաւորն Երուսաղէմի Միւֆթի Զատէ
Մուսղաֆա Բազի Էստին Էֆէնտի 'ի Յոսպէ , ծանօթ
Բիշմիշեան Միքայել Ամիրայի , որոյ պատուիրեալ էր սի-
րով վարիլ ընդ Հայս : Սա 'ի սկզբան ոչ կամեցաւ գնալ՝ այլ
'ի տեղի իւր փոխանորդ կարգել խնդրէր զՆուրի Էֆէնտի ,
և յետոյ գրեթէ բռնի առաքեցին հրամանաւ Արքայի ըստ
կարգի իշխանութեան իւրոյ :

Քաղաքապետն կոչեալ զորդի Դպրապետի դատարա-
նին , որ պատրաստ էր գնալ 'ի Յոսպէ յընդուննելութիւն
Դատաւորին , բանասրկութեամբ պատուիրէ նմա ասել
ցԴատաւորն՝ հաւատարիմ մնալ Բդեշխին , եւ համախոհ
իւր . և կեալ անդորրութեամբ և մի խոտորիլ զհետ չաւ-
ղաց Մուսայ Դատաւորին . պահեալ նմա առաջին որս ըզ-
խնդիր Բեթղէհէմի , որ 'ի մէջ Հայոց եւ Լատինաց , այ-
լովքն հանդերձ :

Թէպէտ գրեալ էր առ նա , այլ պատուիրէր բերանացի
եւս պատմել նմա : Իսկ այրն որ ուսաւ զգաղտնիս նորա ,
եկեալ առանձին 'ի վանս Հայոց պատմեաց Մերունեաց
զբանս նորա եւ լուեալ զարժանաւոր պատասխանիս խա-
ղաղութեամբ մեկնեցաւ անտի :

Եւ հասեալ 'ի Յոսպէ՝ գրեաց առ Թէոդորոս Պատրի-
արք Թէ նախ քան զխօսիլն իւր , Դատաւորն զգուշացու-
ցեալ է՝ զինքն չխօսիլ ինչ վասն խնդրոյ Հայոց . զի լուեալ
էր զամենայն ինչ 'ի Նուրի Էֆէնտեայ , և Թէ Արքայն և
մեծամեծք Դրան խնամով վարին ընդ Հայս : Ապա ելեալ
անտի Դատաւորին եմուտ յԵրուսաղէմ՝ հանդիսիւ ըստ սո-
վորութեան ժամանակին ('ի 22 Յուլիսի) :

Չեւ եւս մաքրեալ զխնդիրն Բեթղէհէմի՝ Լատինք յա-
րուցին զայլ իմն վէճ տարօրինակ 'ի Ս . Յարութիւն . զի